

# 3 Jon

## Teik pasi Jon liai ulea

### Kakain ti haxewai teik pepa ie

Jon tel aposel tai teik pas ie hani Gaius tel kahikahi Krai sai 60 ahang muhin ti Jises moih aliawa ape Haeu waxi i hani tesol tonan. Jon kak sasameni Gaius nake lawe i waxi auni teka unau Haeu. I kakane hakui Gaius ti aka haxoi namilon ti Jises Krai. I kakaxi sale huhua seilon, tel unau Krai wanen axan Demetrius ma Diotrepes tetel i kum hong usi nauna ti Haeu ape i ailele waliko lialun. Jon pahan Gaius puas usiwa waliko tenen solian.

---

<sup>1</sup>Nga Jon, tel kahikahi Krai pamu salaimat tetam, nga tai teik pas ie hani o Gaius, tel soliai lohuk nga waheni hawane.

<sup>2</sup>Tel soliai akikik ti Krai, nga kamei Haeu aile hasoliai totonam. Nga tiori ka wasolam kapin pate solian ape tin nga kamei i hasolia kapitiniwa tupuam. <sup>3</sup>Nga amuam hawane ti tesol kahikahi Krai lua hanima kapik ape kaxi hani nga ka tutuham xoxoan ti kakai Haeu. Nga soh ka salan. <sup>4</sup>Waliko liai kum hamuamua nga hanowi lalape amuam tetak ti nga amuke teka natuk ti Krai nake lato aile usiwa kakain salan ti Haeu.

### Hualiwa teka ailei puase Haeu

<sup>5</sup>Tel soliai akikik ti Krai, solian wanen pupuam ti o huali auniai teka kahikahi Krai kalak teka ti pate o kum tiori. I kola ka o tel unau Haeu wanen. <sup>6</sup>Teka ti lato kaxi haniwen amite teka kahikahi Krai ie sale wawahen tetam. Pate solian wanen na o huali tatale lato. Axiwa lato tenen na lato tae ti nanahialato. O kewa ongawi lehe i hamuamua Haeu. <sup>7</sup>Teka seilon ien lua hani tesol tesol ti ailei puase Jises tel Masiwi ma lato kum uke huhual ti teka laha kum soh ti Haeu. <sup>8</sup>Aile ape kako auniwa lato. Na kako aile ukek ien i kola ka kako tuaulato ti ailei puase Haeu ape seilon liai tiori kakain salan tetan.

<sup>9</sup>Nga taiwen teik pas liai hani teka kahikahi Krai kapim sale auniai seilon tuahe tel seilon axan Diotrepes i kum nam waxi nauna tetak.

Pahan seilon hong usiwa mewenae i. <sup>10</sup>Na nga tahia haniwa kapim, nga kaxi ahuti hani teka kahikahi Krai waliko ti Diotrepe ailele. I misahi hialalu nga hani seilon liai. Tuae kumahe mewenae tenen ien. I kum waxi auni teka kahikahi Krai lawe laha lua hani tesol tesol ape tin i halini ti hualialaha. Na teka tahi kakaian ape huali teka seilon ien, i xaxaweni lato ti leili teka kahikahi Krai.

<sup>11</sup>Tel soliai akikik ti Krai, kum ukekene saun lialun, ukenewa saun solian. Tel i weli ailei saun lialun i kum tioi wanen Haeu a tel na i aile tatale saun solian i kola ka i nati Haeu. <sup>12</sup>Masin Demetrius, tetel teka kahikahi Krai kak sasameni nake i aile ususi kakain salan ti Haeu. Nga tin nga ukek i seilon sawisawin ape o tioi lawe nga kakaxi kakain salan.

### **Tiliai kakai Jon**

<sup>13</sup>Kilan kakain tutuen ti kakaneam tuahe nga kum tai he teik pasuk ie. <sup>14</sup>Pahak wanen nga lua hani kapim pala aope lehe kalu he kakak ti awakalu wanen.

<sup>15</sup>Nga kamei Haeu hatona hasoliai tiam. Amuam ti teka akikim ti Krai ie haniwa o. Ape tetak haniwa tel tel teka akikikalu ti Krai ien.